

Siunnersuummut nassuiaatit

### **Nassuiaatit nalinginnaasut**

#### **1. Aallaqqaasiut**

Qeqertaasap Krim-ip inatsisinik unioqqutitsilluni tiguarneqarneranut qisuariaatitut Ruslandimut 2014-imiilli pillaatitut iliuusissanik aammalu iliuusissanik killilersuiffiusunik EU-p (Europæiske Union) atuutsitsiartuaarnera, tamatumalu kingorna Donbas-imi sumiiffiit avissaarnianit aqunneqartut akuersaarniarlugit Ruslandip aalajangiinera kiisalu Ukraine-mik tiguaajartornera tunngavigalugit siunnersuut pilerpoq.

Nunanit tamalaaneersut tamatumunnga qisuariaatitut Ruslandip Ukraine-mik tiguaajartornera assuaraat, tamannalu pillaatitut iliuusissanut suliniutissanik arlalinnik malitseqarpoq, ilanngullugu EU-mit, ulloq 24. februar 2022 aallarnerfigalugu Ruslandimut kiisalu tamatumunnga nangissutigalugu Belarus-imut pillaatitut iliuusissanik annertuunik imalinnik peqqussutini arlalinnik akuersissuteqarsimasumit. Peqqussutit taakkua EU-mi ingerlanneqarput, aammalu naalagaaffinni EU-mi ilaasortaasuni toqqaannartumik atuullutik. Kalaallit Nunaat EU-mut ilaasortaangimmat, peqqussutit taakkua Kalaallit Nunaannut atuutinnigillat imaluunniit pisussaaffiliinatik.

Kalaallit Nunaata pillaatitut iliuuseqarnerit taamaattut aamma Kalaallit Nunaannut atuuttussatut pisussaaffiliissasullu kissaatigiguniuk, Kalaallit Nunaata taakkua nammineerluni akuersissuteqarfigisariaqarpai. Taamaattumik siunnersuummi siunnerfigineqarpoq, pillaatitut iliuusissat taamaattut akuerinissaannut Naalakkersuisut piginnaatinneqassasut, tassalu akuerineqareersut aammalu kingusinnerusukkat akuerineqartarumaattussat.

##### *1.1. EU-p pillaatitut iliuusissanik atuutsitsilernera*

EU-p maannakkorpiat Ruslandip Ukraine-mut saassussineranut qisuariaatitut aningaasaqarnikkut ataasiakkaatigullu pillaatitut iliuusissat sisamat ataatsimoortukkaat atuutsilerpai. Ataatsimoortukkaat taakkua suliniutissanik annertoorujussuarnik arlalippassuarnik imaqarput, assigiinngitsutigut suliassaqaarfiit toqqakkat iluanni Ruslandip suleqatigineqarneranut kiisalu niueqatigineqarneranut sunniuteqarlutik.

Pillaatitut iliuusissat ataatsimoortut 1 ulloq 23. februar 2022 akuerineqarput, aammalu Duma-mi ilaasortanut 338-nut, Donbas-imi sumiiffiit avissaarnianit aqunneqartut marluk akuersaarnissaannut taasisimasunut, pillaatitut iliuusissanik siunnerfilinnik imaqarlutik.

Pillaatitut iliuusissat ataatsimoortut 2 ulloq 25. februar akuerineqarput, aammalu suliassaqaarfinnut tallimanut tunngassuteqarlutik. Siullertut aningaasaqarnikkut killilersuisoqarpoq, ilaatigut Ruslandimi pisortat aningaasalersuinerit imaluunniit niuernermut aningaasaqarnikkut ikiuunnerit imaluunniit aningaasaliinerit, Ruslandimi aningaaserivinnut

namminersortunut aalajangersimasunut aammalu suliffeqarfinnut naalagaaffimmit pigineqartunut aningaasalersueqqinnerit inerteqqutigineqarlutik kiisalu EU-mut aningaasaqarnikkut kaaviiartitsinernut tunngatillugu killilersuisoqarluni. Aappaattut uuliamik qalluinnermut kiisalu timmisartunut, timmisartut sannaannut kiffartuussinernullu aserfallatsaaliuinnermut tunngasunut atugassanik teknologiinik avammut nioqquteqarnissaq inerteqqutigalugu allatigut suliassaqaarfinnut pillaatitut iliuusissat sukannernerusut atuutsinneqarlutik. Pingajuattut tunisassianut marloqiusamik atugassanut, inuiaqatigiinni sakkutuulesornermilu atorneqarsinnaasunut, tunngatillugu avammut nioqquteqarnissamut pillaatitut iliuusissat malunnaatilimmik sukannernerutinneqarput.

Sukannernerulersitsinermi ilaatigut tunisassiat EU-mi marloqiusamik atugassat allattorsimaaffianni atuuttumi suli ilaatinneqanngitsut avammut nioqqutiginnissat inerteqqutigineqarpoq, ilanngullugit teknologiit nutaaliaat nalinginnaasut, soorlu qarasaasiat, maluginiutit, laser-it, siumut ingerlatitsisussat aamma sumiissusersiornermut atortut. Allattukkani taamatuttaaq ilaatinneqarput ikkussugassat ilai atortullu tunisassianik allattorsimaaffimmiittunik tunisassiornermi ilaatinneqartut, soorlu innaallagiamut aqquataasinnaasut. Sisamaattut Ruslandimi naalagaaffiup allanut attaveqartartui, atorfilittat niuertullu Schengen-imut isersinnaanerannut visum-ini qasukkaasimanerit atorunnaarsinneqarput. Naggataatigut naalagaaffiup aqunneqarnerani pissaanilissuarnut taakkualu ilaqutaannut EU-mi pillaatitut iliuusissanut tunngavissarititaasut annertusitinneqarput.

Pillaatitut iliuusissat ataatsimoortut 3 ulloq 28. februar atuutsinneqalerput aammalu Ruslandimi aningaaseriviit pingaarnersaannut nuussinissap inerteqqutigineqarneranik, kiisalu suliassani Ruslandimi aningaasaliinermut aningaasaateqaarfinnut aningaasalersueqataasuni aningasaliinissap inerteqqutigineqarneranik imaqarluni. Aammattaaq aningaaseriviit arfineq marluk nunani tamalaani aningaasaqarnikkut attaveqaammut 'SWIFT'-imut isersinnaajunnaarsinneqarput, aammalu Ruslandimut euro-nik aningaasanik nuussinissap inerteqqutigineqarnera atuutsinneqalerluni.

Pillaatitut iliuusissat ataatsimoortut 4 ulloq 15. marts akuerineqarput, tamatumani siunertaalluni Ruslandip nunarsuarmi aningaasaqarnermit annertunerusumik immikkoortisimaneqalernissaa. Tamatuma atuunnerani ilaatigut suliffeqarfiit Ruslandimi naalagaaffimmit pigineqartut arlallit EU-mi niuerfinnut isersinnaanertik tamaat annaavaat aammalu EU-mi pigisatit nalillit tigusinnaajunnaarlugit. Aammattaaq tamatuma atuunnerani taamatuttaaq niuernermi iluaqutissartaasunut nunap WTO-mi ilaasortaanermini ('Most Favoured Nation'-itut inissisimasutut) atorluarsimasaannut Rusland periarfissaarutsinneqarpoq, kiisalu Ruslandip nunani tamalaani taarsigassarsinissamut aammalu Verdensbanken, International Monetary Fund (IMF) allallu nunani tamalaani aningaasalersuinnermut sullissiviit aqqutigalugit aningaasalersuinissamut periarfissai killilersorneqalerlutik.

### *1.2. Siunnersuummut siunertaasog*

Siunnersuummi siunertaavog, Kalaallit Nunaata Ruslandimut allanullu pillaatitut iliuusissanut Ruslandip Ukraine-mut saassussinerata malitsigisaanik EU-mit (Den Europæiske Union), Naalagaaffiit Peqatigiinnit (FN) imaluunniit allanit aalajangersarneqartunut, Kalaallit Nunaata ilanngutsinnissaanut Naalakkersuisut piginnaatinneqarnissaat.

Pillaatitut iliuusissanut ilanngunnermi Naalakkersuisut aamma pillaatitut iliuusissat Kalaallit Nunaanni pissutsinut naleqqussarnissaannut piginnaatinneqassapput.

## **2. Siunnersuummi immikkoortut pingaarnert**

### *2.1. Inatsisit atuuttut*

Suliassaqarfik maannakkorpiaq inatsimmi maleruagassiivigineqanngilaq.

### *2.2. Siunnersuuttip imai*

Siunnersuut imminermini Ruslandimut imaluunniit allanut pillaatitut iliuusissanik atuutsitsilertusnaanngilaq.

Kisianni siunnersuummi pillaatitut iliuusissat EU-mit (Den Europæiske Union), Naalagaaffiit Peqatigiinnit (FN) imaluunniit allanit Ruslandimut allanullu atuutsinneqalersut ilaaffigilernissaannut Naalakkersuisut piginnaatinneqarput. Pillaatitut iliuusissanik aalajangersaanermi aamma Naalakkersuisut pillaatitut iliuusissat taakkua Kalaallit Nunaanni pissutsinut naleqqussarnissaannut piginnaatinneqassapput. Naalakkersuisut nammineq ingerlataminnik Ruslandimut allanullu pillaatitut iliuusissanik atuutsitsilernissaat siunnersuummi periarfissiissutigineqanngilaq.

Siunnersuummi Ruslandimut allanullu pillaatitut iliuusissat, februaarimi Ruslandip Ukraine-mut saassusseqqaarnerani aammalu 2014-imi martsimi qeqertaasap Krim-ip inatsisinik unioqqutitsilluni tiguarneqarnerani naammassisumi pisimasut, ilaaffigilernissaannut Naalakkersuisut piginnaatinneqarput.

Siunnersuummi aamma Ruslandip Ukraine-mut saassussinera ingerlatillugu, Ruslandimut allanullu pillaatitut iliuusissat nutaat ilaaffigilernissaannut Naalakkersuisut piginnaatinneqarput. Saassussinerit taakkua qanoq sivilisutigisumik ingerlassanersut imaluunniit qanoq ineriartoqqissanersut maannakkorpiaq oqaatigineqarsinnaanngilaq.

Kisiannili aaqqiagiinngissuteqarnerni tiguaajartornernilu allani pilersinnaasuni aammalu Ruslandip Ukraine-mik tiguaajartornernanut attuumassuteqanngitsuni pillaatitut iliuusissat Naalakkersuisut ilaaffigilernissaanut, piginnaatitsinermik siunnersuut imaqanngilaq.

Pillaatitut iliuusissat unioqqutinneqarnerat pinerluttulerinermut inatsit malillugu pineqaatissiinernik arsaarinninnernillu malitseqarsinnaasog, aalajangersaanissamut siunnersuummi Naalakkersuisut periarfissinneqarput.

*2.3. Pillaatitut iliuusissat kinaassusersiunngitsumik nunamullu tunngasutigut killeqarnerat*  
Siunnersuummi piginnaatitsissut, Naalakkersuisut pillaatitut iliuusissat suut ilaaffigilersinnaaneraat tunngavissalimmik imaluunniit nunamut tunngasutigut siunnersuummi killilersuisoqanngilaq. Siunnersuummi killilersuinituaavoq, pillaatitut iliuusissat allaniit akuerineqarsimassasut, assersuutigalugu EU imaluunniit FN, aammalu taakkua Ruslandip Ukraine-mut saassussineraneersuussasut.

Kalaallit Nunaanni Namminersorneq pillugu inatsit (Namminersornermut inatsit) naapertorlugu suliaasaqarfiit akisussaaffigilerlugit tiguneqarsimasut iluanni Namminersorlutik Oqartussat inatsisiliortuupput aammalu ingerlatsisuullutik. Piginnaatitsissuteqarneq siunnersuummi matumani Naalakkersuisunut piginnaatitsissutaasoq taamaalilluni suliaasaqarfinnut akisussaaffigilerlugit tiguneqarsimasunut killeqartussaavoq. Naalakkersuisut pillaatitut iliuusissat assigiinngitsut ilaaffiginnginneranni nalilersuineq taanna ingerlattussaavaat. Tamatuma saniatigut pillaatitut iliuusissat akuerineqartut, aallaaviatigut Kalaallit Nunaata nunatut oqartussaaffiani taamaallaat atuutissapput.

*2.4. Nunanut Allanut Sillimaniarnermullu Ataatsimiititaliamut tusarniaaneq*  
Nunanut allanut sillimaniarnermullu naalakkersuinnermut tunngasutillit suliarinissaat, aammalu pissutsit taakkua apeqquteqarnissamut oqaaseqaateqarnissamullu pissutissaqalersitsineranni apeqqutinik oqaaseqaatinillu saqqummiinissaq, Inatsisartuni Nunanut Allanut Sillimaniarnermullu Ataatsimiititaliap suliaasaraa, takuuk Inatsisartut aamma Naalakkersuisut pillugit Inatsisartut inatsisaanni kapitali 3.

Taamaalilluni Naalakkersuisut pillaatitut iliuusissat ilaaffigilernissaannik akuersinissaat, Naalakkersuisut taakkuninnga ilaaffiginnginneranni, taanna Inatsisartut Nunanut Allanut Sillimaniarnermullu Ataatsimiititaliaanut tusarniaassutigalugit nassiunneqartussaassapput.

*2.5. Innuttaasunit suliffeqarfinniillu taarsiivigineqarnissamik piumasaqaateqarsinnaaneq*  
Ruslandimut allanullu pillaatitut iliuusissat ilaaffigilernissaannik akuersineq Ruslandip Ukraine-mik saassussinera, kingusinnerusukkullu tiguaaniarnera tunngavigalugu pivoq. Naalakkersuisut taamaalillutik pisoq tamaat ajornartoornertut, pisutut siumut takorlooreerneqanngitsutut, isigaat. Naalakkersuisut taamaaliormi annaasaqarsimasinnaanermut, toqqaannartumik taamatullu toqqaannanngitsumik Ruslandimut allanullu pillaatitut iliuusissanik Naalakkersuisut akuersinerisa malitsigisaanik pilersimasinnaasumut, taarsiinissamut akisussaasutut imminnut isiginngillat.

Taarsiinissaq pillugu apeqqutaasinnaasut eqqartuussivinnut suliaakkiunneqartariaqarput.

### **3. Pisortanut aningaasaqarnikkut allaffissornikkullu sunniutaasussat**

Siunnersuutip malitsigisaanik pisortani oqartussat piffissami akkerliissuteqarnerup atuukkunnaarnissaata tungaanut suliaasaqarfimminni politikikkut suliniutissanik imaluunniit

pisussanut pilersaarutiniq aqutsinerminni Ruslandimut pillaatitut iliuusissanik atuutsitsilertussaapput kiisalu killilersuisussaallutik. Atuutsitsilerneq kiisalu tamatuma kingorna tamatuminnga malitseqartitsineq allaffissornikkut suliniuteqarfigineqartariaqarpoq, kiisalu taamatuttaaq pillaatitut iliuusissat annertussusaat aammalu killilersuinerit annertussusissaat pillugit nalunaarutiniq suliaqarnissaq pisariaqartussaalluni.

Naalakkersuisut pillaatitut iliuusissani akuliunnissaq, annertussusaat aamma annertussusissaat pillugit aalajangersaappata kiisalu nalunaarutiniq suliaqarlutik, najoqqutassat suliarineqarnissaat kiisalu suliffeqarfinnut kattuffinnullu killilersuinerit sunnerneqartussat naammassinissaannillu pisussaaffilerneqartussat saaffiginissaat pisariaqartussaavoq.

Aalisarnermut Piniarnermullu Naalakkersuisoqarfik maannakkorpiaq 2022-mut aalisarnermut akuersissutiniq qinnuteqaatinik suli tigusaqanngilaq, taamaattumik aalisarnermut piniarnermullu suliassaqarfimmi Ruslandimeersut aningaasaliisinnaanerat suli paasisimaarineqalinngilaq. Taamaattoq tamatuma paasisimaarilerniarnera ajornakusuussasoq ilimagineqarpoq, tassami maannakkorpiaq inuit aamma immikkoortortat 900-it killilersuineri allattuiffinniimmata.

Peqqinnissamut Naalakkersuisoqarfiup Peqqinnissaqarfimmi aqutsisut, Nunatta Nakorsaanera aamma Allorfik suleqatigalugit Ruslandimut aamma Belarus-imut attuumassuteqarsinnaanerit, Ruslandimut pillaatitut iliuusissanit kalluarneqartussatut eqqarsaatigineqarsinnaasut, misissorpai. Peqqinnissaqarfik IT-nik pilersuisoq 'Fujutsu' aqutigalugu Ruslandimi pilersuisunut annikinnerusumik attuumassuteqarsimavoq, kisianni tamanna unitsinneqarsimavoq. Ataatsimeersuarneq International Union for Circumpolar Health, nunatta nakorsaaneqarfiata peqataaffigisassaralua taamaatinneqarpoq. Aammattaaq Peqqinnissamut Naalakkersuisoqarfik Issittuni Siunnersuisooqatigiit ataanni suleqatigiissitaliami, EPPR-I, peqataasimavoq, tamannalu Ruslandip Ukraine-mik tiguaaniarnera pissutigalugu unitsikkallarneqarpoq.

Kultureqarnermut, Ilinniartitaanermut, Ilageeqarnermut Timersornermullu Naalakkersuisoqarfiup paasissutissiissutigisinnaavaa 'Arctic Winter Games'-imut, 2023-mi Canadap ingerlatsisuuffigisassaanut, Ruslandimeersut peqataanissaat atorunnaarsinneqarsimasoq. Tamatuma saniatigut Issittumi Siunnersuisooqatigiinni ilisimatusarnermi suleqatigiinneq kalluarneqarpoq, tassami suleqatigiinneq tamarmi Ruslandimiit peqataaffigineqartoq unitsikkallarneqarmat, ilanngullugit ilaatigut International Arctic Science Committee aamma Forum for Arctic Research Operators.

Isumaginninnermut, Suliffeqarnermut Nunamullu Namminermut Naalakkersuisoqarfik paasissutissiivoq Ruslandimut pillaatitut iliuusissat ilaaffigilerneranni suliffissat ilaannik annaasaqarnermik tamanna kinguneqassasoq ilimanartoq, aammalu ataatsimut isigalugu Ukraine-mi sorsunnermi iliuutsit Kalaallit Nunaannut qimaasoqarneranik aamma kinguneqarsinnaasut.

**4. Inuussutissarsiortunut aningaasaqarnikkut allaffissornikkullu sunniutaasussat**

Siunnersuut Ruslandimi niuerfiup iluani niuernermini periarfissat allanngornerannik malitseqarpoq. Niuernermit atatillugu killilersuinermin pisussaaffiliisoqartussaavoq, ilanngullugu avammut nioqquteqarneq aamma assartuussinermini periarfissat, tamannalu inuussutissarsiortunut aningaasaqarnikkut allaffissornikkullu sunniuteqarsinnaavoq.

Naatsorsuutigineqarpoq akkerliinnerup paasinarsisinnerqarnissaata imaluunniit unitsinnerqarnissaata tungaanut suliffeqarfiit kattuffiillu avammut nioqquteqarneq, niuerneq aamma Ruslandimik suleqateqarneq tamaat unitsikkallassagaat.

Tamanna inuussutissarsiortunut aningaasaqarnikkut allaffissornikkullu sunniuteqarnernik malitseqarsinnaavoq, tassami avammut nioqquteqarnerup niuernerullu unitsikkallarnerqarnerat aningaasaqarnikkut annaasaqarnermik malitseqarsinnaammat.

**5. Avatangiisinut, pinngortitamut inuillu peqqissusaannut sunniutaasussat**

Siunnersuut avatangiisinut, pinngortitamut inuillu peqqissusaannut sunniuteqassagatinneqanngilaq.

**6. Innuttaasunut sunniutaasussat**

Siunnersuut innuttaasunut sunniuteqarsinnaavoq, tassami pillaatitut killilersuinerit annertooujussuit, aamma innuttaasumut nalinginnaasumut eqquisinnaasut, EU-mit akuerineqarmata.

**7. Sunniutaasussat annertuut allat**

Akkerliinnerq qanoq ineriartussanersoq kiisalu siunissami pillaatitut iliuusissat nutaat suut atuutsinneqalissanersut, maannakkorpiaq oqaatigineqarsinnaanngilaq.

**8. Oqartussanut kattuffinnullu il.il. tusarniaaneq**

Siunnersuut Naalakkersuisut tusarniaanermut nittartagaanni piffissami XXX sivikillisamik tamanut ammasumik tusarniaassutigineqarpoq. Siunnersuutip immikkut ittutut nukingernartutullu isikkoqarnera pissutigalugu sapaatit akunnerini 4-ni tusarniaanermut killigitap nalinginnaasup malinnissaa ajornarsimavoq.

Siunnersuut aamma oqartussanut kattuffinnullu il.il. makkununga toqqaannartumik nassiunneqarpoq:

XXX.

**Siunnersuummi aalajangersakkanut ataasiakkaanut nassuiaatit***§ 1-imut*

Aalajangersakkami Ruslandimut allanullu pillaatitut iliuusissat, EU-mit (Den Europæiske Union), Naalagaaffiit Peqatigiinnit (FN) imaluunniit allanit aalajangersagaasut, ilaaffigilernissaannik akuersinissamut Naalakkersuisut piginnaatinneqarput.

Oqaatsimi ”Rusland allallu” pineqarput Ruslandip Ukraine-mut saassussinermini peqatigisai tapersersortaalu. Maannakkorpiat pingaartumik Belarus tassani pineqarpoq. Kisianni tamanna allanut, taakkua Ukraine-mut saassussinermini peqatigisaatut imaluunniit tapersersortaatut isigineqartariaqarpata, annertusitinneqarsinnaavoq.

Oqaatsimi ”imaluunniit allat” oqaaseqatigiinni kingullerni pineqarput nunani tamalaani kattuffiit imaluunniit nunat kattullutik, Ruslandip Ukraine-mut saassussineraneersumik, Ruslandimut pillaatitut iliuusissanik aalajangersaasimasut. Nunat kattuffiat inuiaat pisinnaatitaaffiinit isigalugu nunani tamalaani kattuffiusariaqanngilaq.

Pillaatitut iliuusaasinnaasut allanit akuerineqareersimanissaat, aammalu tamatuma kingorna Kalaallit Nunaata taakkua ilaaffigilersimagai, piumasaqaataavoq. Naalakkersuisut nammineq ingerlataminnik pillaatitut iliuusissanik nutaanik atuutsitsilersinnaanngillat.

Tamatuma saniatigut pillaatitut iliuusissat Ruslandip Ukraine-mut saassussineranit pisuunissaat piumasaqaataavoq. § 1-imi piginnaatitsissummi Ruslandimiit imaluunniit allaniit saassussinerit malitsigisaannik, Ruslandimut pillaatitut iliuusissanik akuersinissamut Naalakkersuisut inatsimmi tunngavissinneqanngillat. Piginnaatitsissut maannakkut pisumut februaarimi aammalu 2014-imi martsip qaammataani aallartittumut killeqartinneqarpoq. Taamaattoq pisup taassuma atuutiinnarnerani piginnaatitsissut atuutissaaq.

*§ 2-mut*

Pillaatitut iliuusissat ilaaffigilernerat nalunaarummi aalajangersarneqassaaq. Pillaatitut iliuusissanik aalajangersaanermi Naalakkersuisut taakkua Kalaallit Nunaanni pissutsinut naleqqussarsinnaavaat.

Naalakkersuisut nalunaarummi pillaatitut iliuusissanik aalajangersaareerneranni, pillaatitut iliuusissat taakkua ingerlaannaq Kalaallit Nunaata akisussaaffeqarfiani kimulluunniit atuutilissapput pisussaaffiliisussaallutillu. Tamatuma saniatigut pillaatitut iliuusissat taakkua unioqquatinneqarnerat pinerluttulerinermut inatsit malillugu pineqaatissiiinernik arsaarinninnernillu malitseqarsinnaasoq, aalajangersaanissamut Naalakkersuisut periarfissaqarput.

Tassani pillaatitut iliuusissat allat, sumiiffinni allani Kalaallit Nunaanniit allaanerusuni atuuttussatut suliarisimasaat, Naalakkersuisut ilaaffigilernissaat akuerippasigit, pillaatitut iliuusissat taakkua imarisamigut pingaaruteqarnissamut, aammalu inatsisitigut atuutsinneqarsinnaanissaannut Kalaallit Nunaanni pissutsinut naleqqussarneqartariaqarnerat, ilimanaateqarnerusussaavoq.

Taakkua oqaatsitigut naleqqussaanagerusinnaapput, tassani pillaatitut iliuusissat assersuutigalugu nunanut EU-mi ilaasortanut innersuussippata, taakkununga Kalaallit Nunaat "ilanngunneqartariaqarluni", kisianni aamma imarisaasigut naleqqussaanagerusinnaapput, Kalaallit Nunaanni pissutsini pisariaqarlutik.

Pillaatitut iliuusissat innuttaasunut suliffeqarfinnullu il.il. atuutsinneqarsinnaanissaannut, pillaatitut iliuusissat imarisamigut naleqquttumik ersarissuunissaat pisariaqarpoq. Tassa imaappoq, pisussaaffiit suut innuttaasunut suliffeqarfinnullu il.il. atuunnersut naleqquttumik ersarissumik allassimasariaqarpoq.

Pillaatitut iliuusissat unioqqutinneqarnerat pinerluttulerinermut inatsit malillugu pineqaatissiinernik arsaarinninnernillu pillaatitut iliuuseqarfigineqassappata tamanna pingaartumik atuutissaaq.

### *§ 3-mut*

Pillaatitut iliuusissanik aalajangersagaasunik unioqqutitsineq pinerluttulerinermut inatsit malillugu iliuusissanik pineqaatissiivigineqarsinnaasoq aalajangersaanissamut, aalajangersakkami Naalakkersuisut piginnaatinneqarput. Tamatuma saniatigut aamma pinerluttulerinermut inatsit malillugu arsaarinnittarnerit pillugit aalajangersakkanik aalajangersaasoqarsinnaavoq.

Pinerluttulerinermut inatsit malillugu pineqaatissiinerit arsaarinninnerillu aamma ingerlatseqatigiiffinnut il.il. (pisinnaatitaallutillu pisussaataasut) pisussaaffiliunneqarsinnaapput.

Akiliisitsinerit arsaarinninnerillu nunap karsianut tutsinneqassapput.

### *§ 4-mut*

Inatsisartut inatsisaat Inatsisartut inatsisaata atuutilernerata nalunaarutigineqarnerata aqaguani atuutilissaaq.